



YMA thiltum: 1. Hunawl hman that. 2. Zofate hmasawwna ngaihtuah. 3. Kristian nun dan tha ngaihsan

Vol. 43	Issue No. 12	Ramhlun North: Ni 22 March, 2025
BRANCH THU THAR ■ PEM LEHKHA: Pem lehkha nei lovarawn insawn thar kan awm leh ta nual mai. In neituten lo ngaipawimawh hram hram turin kan inngen nawn leh a ni. Tin, Section hruaitute pawhin mahni section huam chhunga rawn insawn thar te lo ngaihven tha turin kan inchah nawn leh e. ■ Pu Francis Vanlalzuala, C-Sec. chuan kan Memorial Park, Seling ram a mi company in an luahna tur Lease Agreement tha takin min siam saka a chungah lawmthu kan sawi tak meuh meuh a ni e. SECTION THU THAR ■ Khuangchera Section: Ni 20.03.2025 (Ningani) zan khan, member pum huap hnatlang neih a ni. Member thawk chhuak zawng zawng te leh inhlawhna min siam sak tu Section Adviser Dr. Lalhmuchhuaka chungah lawmthu section hruaituten an sawi e. ■ Taitesena Section: Ni 21.03.2025 (Zirtawpni) zan khan Thlan laih Hnatlang neih a ni a, member 32 an thawkchhuak a, thlan 2 an lai. SUB.COMT THU THAR ■ Kumpuan Sub Committee: Ni 25.03.2025 (Thawhlejni) hian committee hmasa ber neih an tum a. Committee member-ten lo hriatlawk tur a ni e. ■ Library Sub Committee: Vawiin chawhnu hian committee member-te Library Room-ah an hnatlang. Dr. Lalsiampara Sailo, T-Sec. chuan kan YMA Library-a dah turin a lehkha bu ziah ‘Ka dai chin khawvel’ tih bu 5 lai mai min pe , a chungah lawmthu kan sawi mawlh mawlh e. ■ Property Sub Committee: Sawihchiar siamna LED light siamin an hnatlanga, tin, CCTV monitor Library Room a mi chu Committee Room-ah sawn a ni.	YMA VILLAGE PROFILE APPS TLANGZARH (Branch parukah enchhin phawt dawn) Ramhlun North, the 22nd March, 2025: Ni 12.3.2025 (Nilaini) chawhnu dar 2:00 khan Central YMA Committee Room-ah YMA Village Profile Apps tlangzarhna hun hman a ni a, Pu Lalhmachhuana, Central YMA President in a tlangzarh. Tlangzarhna hun hi Pu Fabian Lalfakawma, Assistant Secretary in a kaihruai. Pu Lalhmachhuana, President, Central YMA chuan thu sawiin YMA chuan tunlai khawvel thang chho zelah YMA te pawh hma kan sawn chho zel a. YMA member mai ni lo, vengchhung / khaw chhunga mihring chengte dinhmun kimchang dah khawmna tur Village Profile kan nei thei ta hi a lawmawm tak zet a ni. YMA-in bung thar a kai dawn niin a lang a, Branch YMA ten veng mipui chhinchhiah a kumtin an ziah thar thin chu a ngai tawh dawn lo a YMA-in hmasawwna kawng a zawh zel chu lawmawm a tih thu a sawi bawk. Prof. Malsawmliana, General Secretary chuan report a pe a. He Village Profile Apps hi Lailen Consulting Private Ltd. siam a nih thu leh Mizoram Sawrkar nen tang tlang a siam a nih thu sawiin hei hi YMA mai bakah Sawrkar tana data tangkai tak a la nih tur thu a sawi. Village Profile siamna atan hian Home Department atangin Rs. 10,00,000/- dawn a ni a, hei hian a siamna mai bakah kum engemaw chen a enkawl zui zelna tur a daih dawn a, Home Department chungah Central YMA in lawmthu a sawi a ni. Village Profile App hi Aizawl khawpui Branch parukah hman chhin phawt tura ruahman a ni a, a siamtu Lailen Consulting Private Ltd. atangin inhrilhfhahna hun hman a ni bawk. Pu MS Ralte, Finance Secretary in lawmthu a sawi. Central YMA YouTube channel-ah Video en theih in a awm e.	RUIHHLO DO HNATLANG NEIH A NI YMA Rorel Inkhawm 2024-in “<i>Ruihhlo Do kawngah YMA-in tun aia chak zawkin hma la rawh se</i>” a tih bawhzuina kawng khat atan vawiin ni 22.03.2025 hian Aizawl khawpui chhunga YMA branch zawng zawng te mahni branch huam chhungah Ruihhlo Do hnatlang runpui neih tura ruahman a ni a. Hemi atanga bawizui ngai zingah mahni Branch YMA pawn lama chet chhuah ngai a awm a nih chuan, a tul angin CADS Duty-te pawh phungbawmah sawm theih an ni ang. He hnatlang runpui atan hian a tul ang angin Police leh Excise & Narcotics Deptt. lam pawhin min pui turin an inhawng hle a ni. Central YMA thu bawhzui hian vawiin hian kan branch hruaitute pawh vengchhungah hnatlang neih a ni a. Vengchhunga ruihhlo tihna hmun nia hriat te fan kual a ni a. Zu leh ruihhlo kawl nia hriatte pawh lenchilh niin sim tura hraittir nghal an ni. Ruihhlo chungchangah kan veng kan hluar viau nia sawi a awm laiin veng chheh vel leh veng tam tak ngaihtuahin kan dinhmun a la ziaawm viau niin a lang a, veng mipuite ruihhlo chungchangah tangrual zel tur leh a hminga hruaitute hmalakna thlawp tlat thin turin branch hruaitute chuan min ngen nghal a ni. Ruihhlo chungchang bakah hian vengchhungah rukruk leh pawikhawihna a thleng zeuh zeuh a. A hminga hruaitute tan pawh ven vek sen a nih loh chin a tam hle. Chhungtin ten kan in leh a chheh vel ngaihven zualin rukru tan pawha chetvelna rem lo thei ang ber turin inven i tum theuh ang u. Vengchhungah harsatna hrang hrang a thlen chang a awm thin hetiang a lo thlen chang hian chhungtin ten midang kutah dah vek lovin kan theih chinah veng tan theihtawp chhuah tlang hram hram ang u.



RUIHHLO DO

Hmasang aṭang tawhin mihringte buaipui ber pakhat chu ruihhlo hi a ni a, khawvel hmasawn zelah a chi thar a chhuak zel a, hei hian mimal, chhungkua leh khawtlangah te harsatna namen lo a thlen ṭhin. Ram changkangah pawh he harsatna hi a thleng a, ram rethei deuhah pawh a thleng tho bawk.

Ruihhlo hian tleirawl te a bitum bik deuh ber ṭhin a. Tleirawl laia he bawiha lut ten tal chhuah harsa an ti em em a, tal chhuak ta lova zamual liam tam pawh an tam hle a ni. Tal chhuah hi thil namai a ni bik hauh lova, a bawiha tang te pawh hi han dem viau hleihtheih pawh an lo a ni. Ruihhlo ṭhenkhat phei chu an zun ngaih a na lehzuall a, insum theih lohna nasa takin an mahniah hna a thawk ṭhin a, hei hian pawl khawihna dang a thlentir ṭhin.

Ruihhlo hi kan kiangah hian a awm reng dawn a ang. Khawvel lehlam pawh thlir ila a rem bik hauh lo. Do nat viau pawhin hmuh tur a awm zel. Kawng dang dang hmangin a rawn lut thei zel tho zel. Mamawmhna a san chuan hmuh dan kawng a awm zel si.

Hetah chiah hian mahni mimal ṭheuh kan pawimawh ta a ni. Chhin ve loh hi a him ber chu a ni. Kan tu leh fate hnenah pawh he thu hi an rilruah kan tuh ngheh a ngai a ni. Tunlai khawvel a changchang tawh a, ṭhangtharte rilru put hmang pawh a lo dang ta hle mai. A tih loh zawngah chuan nawr an har hle a, an rilru mila kan kawm thiam te pawh a ngai. Vawi khat tihin vawi za tam tak tih a thlen thei a. He lam kawng hi an zawh loh nan uar tak leh an mahni ze mila kan inenkawl a ṭul tak zet a ni. Ruihhlo hian mi tam tak an nih tur ang pawh ni tir pha lovin mihring lova siamtu a nihna hi an hriat a ṭul tak zet a ni.

He kan hnam hmelma lian hi do zelin mimal, chhungkua aṭanga bul ṭan hi kan mawhphurhna a ni. La tem lo ten an tem lova an hawi san theih nan hma i la zel ang u.



TLUBING AN TIH HI!

Mizo upate ti ti ah leh thil mak, danglam sawi rik zingah hian Tlubing an tih mai rul tawi tip tep, rul dang ânga a tlênga tlêng ve lo, lu tun deuh ár ár a, hma lama inbin let tap tap ṭhin rul mak tak hmu tu an awm chanchin hi sawi rik a awm ve leh zauh ṭhin avângin ka hmuh leh ka tawn ni lo mahse, upa te ti ti ami, tlem han thai lang ve lawk ila, thil awm thei a ni lo pawh mah ula, tumah kan mawh lo e.

Mizote hi ti ti tur hre tak, han belh chian tak taka 'Chumi chuan a tia lawm!,' tih vela hmâwr bawk leh ta mai hi kan tam a, ziaak a han in hlan chhawng thlip thlep tur lahin thuziak na fûng/ hmanrua kan dawm tlai fû bawk nen a tu amah hi han indem tur reng kan awm lo niin a lang.

Hnam pui zawk te thu ziaak ah pawh, hetiang rul danglam tak chanchin hi han chhui bing tur vâng tak mai a ni a.

Khawthlang ramah phei chuan hriat hlawh lo ber pawl a ni hial awm e. Chumi a nih rual in khawchhak lamah khi chuan a lo awm tawh ṭhin ni ngei in a rinawm. Chumi rualin, thil hmuh thianga lo ni a ngai tam tak an awm aṭang hian thil awm ve ngei, mahse, thil vâng tak ni ngei in a rinawm bawk a.

Rul chanchin zimalamah hmelhriat tu tam lo hle mahse, a hmu tu ni a an sawi te zînga mi pakhat chu paihte pasaltha Kapzathang a ni. Kapzathanga hi a vânglai chuan Khampat aṭang Tahan phai leh tlâng tin deuh thaw ah sa pel a ram chhuak ṭhin niin an sawi a. Sa a mir ṭhin hle a, ram sai pawh pahnih lai a kap tawh niin sawi a ni bawk.

Kum 1975 khan Khampat âng Hmunṭha khaw chhuah lam dil pui rama an ram chhuah tumin, Tlubing an tih mai rul tawi tep tup, gas bur tia zêt, a dung tâwng thum vel leka sei an tih chu dil pui kam, tui seh chinah a hmu a, a kap ta a. A kah aṭanga rei lo ah damlo in, an riah bukah a thi ve nghal niin an sawi a, a ruang an zawn haw ta a, in an thlen chuan an tualah hul hliap an lo zar sa duai mai a, an luh pui chuan a fapa upa ber, kum 14 mi Dothanga chu Kapzathanga'n Tlubing a kah hun âwm velah khawi lam aṭanga rawn kah nge tih pawh hriat lohin a nakah an lo kap ve reng mai a lo ni a, a hliam tuar lovin sum hmunah a lo thi reng mai a ni. A kah hun ni-a an sawi hi zing lam tukthuan ei hun vel niin an sawi a, a fapa thih hun nen hian a in per san lo hle niin an sawi. Khi lai Dilpui ramah bawk khian, kum 1980 khan Pu Saichhunga'n rul tawi tak, mei zuih tut mai, ui pum tia zêt a lian, a dung patling tâwng 2 vela sei rul danglam

tak a lo hmu ve tawh a, a kap duh ta lo a ni. Kawl puithiam ho chuan hmuh thianga lo ni a an ngaih avângin Pu Saichhunga pawh thi ngei turin an ring a mahse, eng em ti lo in, tar khup bih thleng a dam a ni.

He Dilpui ram hi tûnah chuan kawl puithiamte'n an pathian biakna hmun atan an hmang ta a, kum tin tlawhtu an tam ṭhin hle niin an sawi. He rul danglam tak Tlubing an tih hi thil awm tak tak a ni ngei ang.

Pu Ramhluna (L) Champhai pa khan, Halkha rama an awm laiin, ṭum khat chu an ramvahna ah rul tawi tak lian em em si, tleng lova awi chhuk leh kham panga a lum-a lum an hmuh tawh thu a sawi thin. A sawi danin rul dum hlûrh a ni a, a mit kovah kî niáwm tak châwr chhuak a awm a ti. Khapdiau âng deuh hian a lu a ti kang úr úr a, a inperh kang thei a ti bawk. Tin, saphu ânga in hlumin kham ah thui tak tak a lum thei a ti. Thil mak ve tak chu a ni phawt mai.

Pu Ramthara (Aizawl, Khatla) pawh khan Manipur-a an chen laiin a ramvahna ah hmu niin a insawi a, a sawi danin pangâng chi khat a perh a inperh kang nelh nelh chi nen a inâng ber, tiin a sawi a, a hmuhna a hlat deuh avângin kal hnaih a belh chian a tum chuan a lo inperh bo hman tawh niin a sawi.

Tunlaiah mihring kan changkang tawh a, rul chanchin pawh hriat lohva mual a awm ta meuh lo, mahse hetiang rul kher kher hi chu kan Mizo upa te, ti ti kotlang a mi bak kan hre pha ve lo a, hriattur a zeng pawh a awm meuh lo a ni.

Hnamdangte hian an lo nei ve reng em le? A tluk pui tur awm ang tal pawh?

Japanese ho in Tzuchinoko an tih nen khian thil thuhmun a ni thei mai lovang maw, ti pawh an awm nual âwm e. Tzuchinoko an tih te hi taksa tawi lian tak phek deuh, ft. 2-3 lek-a sei, lu kil thum nei, mit-ko chunglam a ki tawi te nei ânga sawi a ni a. An pian hmang leh khawsak dan hi Mizote'n Tlubing kan tih nen hian thil thu hmun a ni lo tih a sawi theih bik hauh lo mai. An sawi dan chuan rul dang anga tleng lo in, hmalam zawng hian khapdiau in khap ang deuh hian a kal ṭhin a, a taksa chu intûng in hmalam zawng a tlu phei in a kal ṭhin bawk ni in an sawi.

Tin, saphu ânga inzial mum in âwih pangah te pawh chhuk zawngin a lum thin bawk ni in an sawi a. Tin, faifuk ri ang deuh hian a hram ve ṭhin a, a rim a ná hle a ni an ti.

Japanese ho in a Tzuchinoko an tih te nen hian thu hmun leh hnam khat emaw, an khawsak na ram a hran tak avâng a, a len leh tet lo danglam ta te pawh a ni thei mai lo vâng maw?

Editor: Eddie Lalfakzuala (7005269255); **Jt. Editor-te:** Lalrotluangi Zote, RK Lalmuanpuia, Lalnuntluanga, Vanengmawia
Manager: C. Lallianzuala (9862365843); **Asst. Manager-te:** Zodingiana, Lalrinchhana, Lalrinawma
Circulation Managers: PB Lahuapzauva, Samuel Lalhlupuia, Hmingthanazuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia

DAMLO

■ Pu K. Lalruala, kan President hlui Synod Hospital, Durtlang awm chu dam takin a lo chhuak leh ta.

■ Rev. C. Biakmawia, T-Sec. chu Synod Hospital, Durtlang aʔangin a lo chhuak leh ta.

■ Pu T. Khumtira, T-Sec. chu LRM Hospital-ah enkawl mek a ni a, tin, an nu Pi Lawmi pawh hritlang khawsik avangin in lamah enkawl mek a ni.

■ Tv. Lalrinpuia s/o Lalchhuanmawia, C-Sec. chu ZMC-ah zai a ni.

■ Pi K. Zarzoliani w/o Lalhmingchhuanga (L), K-Sec. chu septicaemia avangin LRM Hospital-ah enkawl mek a ni.

■ Rev. Sanghnuna, V-Sec. chu Synod Hospital, Durtlang aʔangin a lo chhuak leh ta.

■ Miller Lalchhanhima s/o William Lalfakawma, V-Sec. chu Synod Hospital, Durtlang NICU ah enkawl mek a ni.

■ Pi Zirtluangi w/o Rorelliana, S-Sec. chu pum na avangin in lamah enkawl mek a ni.

KOHHRAN

■ **Roman Catholic:** St. Thomas Church Ramhlun, Parish Silver Jubilee (25) pualin Lent hun chhunga Retreat neih chhunzawm mek a ni. **Catholic Thalai Pawl (CTP)** te chuan March ni 21-23 thlenga Retreat nei turin St. Thomas Parish, Ramhlun (Kohhran Hall-ah) zan riak lutin hun hman tum a ni. Main Preacher tur hi Rev, Fr. James Zodinlana (Parish Priest, Ramhlun) a ni.

■ **Ramhlun East KTP:** Vawiin hian biak in hnuaiah blanket suk hnatlang an nei.

■ **The Salvation Army:** Central North Division Corps Cadet Graduation Day naktuk nileng hian hun an hmang ang.

LOCAL COUNCIL

■ **Hnatlang:** Ni 29.03.2025 (Inrinni) zingah veng pum huap hnatlang neih tur a ni a, phatna Rs. 100, runna Rs. 200. Hnatlanga thawk chhuak te inngahkhawmna tur chu tlangau lamah lo ngaihchan tur a ni e.

■ Vengchhungah ruk ruk leh thil bo a hluar hle mai a, vengchhung mipuite fimkhur leh zual turin kan in chah a, zanah mahni varanda light theuh te **on** tlaivar turin kan inngen e.

ZIN & HAW

■ Pu Lalrochama, kan Vice President chhungkaw pawimawha Hnahlna zin chu a lo haw leh ta.

■ Pu Biakchungnunga, kan Secretary chu a pa Pu Zoenga dam lo inentir puiin Guwahati-ah a zin.

■ Pu Joseph Lalhminglana, kan Asst. Secretary chu hna thilah Lawngtlaiah a zin.

■ Pu H. Lalruatlana, kan President hlui te chhungkua chu an hnathawhna hmun Mumbai aʔangin an lo haw.

■ Pu R. Lalrinmawia, kan President hlui te chhungkua chu chhungkaw pawimawh thilah Hnahlna-ah an zin.

■ Pu Vanlalruata Ralte, kan President hlui te nupa chu Thenzawlah an zin.

■ Pu Vanengmawia, kan Jt. Editor chhungkaw pawimawh buaipuia Kawnpuia zin chu a lo haw leh ta.

■ Pu Michael F. Lalawmpuia, N-Sec.

Tv. Lalmuanpuia Zote, T-Sec.

Tv. Malsawmtluanga, N-Sec.

Tv. Lalruatkima Sailo, V-Sec.

Tv. Lalruatpuia, V-Sec.

Tv. RD. Vanlalmangaiha, C-Sec. Mizoram Super League khela Champhaia zin chu an lo haw leh ta.

■ Pi Lalhmingmawii w/o G. Collin Lalrinkima, V-Sec. chhungkaw pawimawha Khawruhiana zin chu a lo haw leh ta.

■ Tv. Jacob Lalpeksanga, V-Sec. MARYMA agent thil pawimawh buaipuia Champhaia zin chu a lo haw leh ta.

■ Tv. Rohminglana Sailo, S-Sec. chuan a u Ronguri dam lo Mumbai-ah a hruai.

■ Er. Lalchhuana leh Pi Baby Zorammuani, V-Sec. te nupa chu inentirin Vellore-ah an zin.

■ Hon. Capt. VR. Mawia, S-Sec. chu chhungkaw pawimawhah Zawng In leh Suangpuilawnah a zin.

■ Dr. Lalʔanpuia te nupa, S-Sec. chu Lawngtlai, Chawngte leh Thenzawlah an zin.

■ Pu PB Lalramsia, T-Sec. Hnahlna zin chu a lo haw leh ta.

■ Pu Lalremruata Colney leh Tv. Michael Lalmalsawma, S-Sec. te inneih hmanga Khanpuia zin chu an lo haw leh ta.

■ Pu Lalrinlana, S-Sec. chu chhiat tawh avangin Serkhanah a zin.

LAWMAWM

■ Pu James Lalrindika Hnamte leh Pi Zokhumi Hauhnar, C-Sec. te nupa chuan ZMC-ah fanu an nei thar.

■ Pu Laltlanhlua leh Pi Laliansangi, T-Sec. te nupa chuan Synod Hospital, Durtlangah fapa an nei thar.

KEIMAHNI

■ Vawiin hian kan branch hruiute an rawn leng lut a, chhun thingpui leh a hmeh tuihnai tak min khilai a, kan puarin kan fain kan lawm hle a, lo leng ziah se kan va ti em!

CENTRAL YMA THU

■ Union Home Minister Amit Shah Mizoram rawn zin chu Raj Bhavan-ah NGO CC hminga an hmuh bakah, Central YMA OB ten Central YMA hmingin an hmu baw a, hengte hi ziakin an thlen.

1) Lengpui Airport tichangtlung tura ngenna.

2) Ruihhlo do-na tura sum tam zawk ruahman tura ngenna.

3) 8th Scheduled-a Mizo ʔawng dah luh a nih theihna tura hmalak sak tura ngenna.

4) BSF Mizo Battalion din tura ngenna.

5) India leh Myanmar inkara Free Movement Regime tih bo a nih lohna tura hma la tura ngenna.

6) Mi 5000 vel leng Convention Centre sak chungchang.

7) Myanmar, Bangladesh leh Manipur aʔanga ral tlante ʔanpuina tur sum ngaihtuahpui tura ngenna.

■ Central YMA Hall-ah Central YMA hnuaia ruihhlo do pawl Central Anti-Drugs Squad (CADS) 2025 First Batch hruiute leh member te lawmluhna hun hman a ni.

■ Tunhnaia Manipur a Zofa unau Hmar leh Paite te inkara inhriatthiam lohna thleng chungchangah Central YMA Office-ah Hmar Inpui hruiute leh Central YMA OB te an inkawm a, hemi hnuaiah hian Siamsin Pawl Pi hruiute nen an inkawm leh a ni.

PAWL DANG

■ **MUP:** Ni 21.03.2025 (Zirtawpni) khan MUP Ramhlun North branch te chu DIET peng leh a chhehvel tifaian an hnatlang.

THILDANG

■ Pu F. Thanzauva, S-Sec. te chuan ni 20.03.2025 khan an fapa hraitrengna lung an phun.

■ Pu PB Laithuama, T-Sec fanu PB Lalmangaihzuai chu ni 20.03.2025 khan a boral a, a pasal neihna Durtlangah vuiliam a ni.

■ International Day of Forest 2025 ni pualin EIACP Hub, Mizoram Pollution Control Board te chuan Ramhlun North thlanmual, Zemabawkah Ashoka tree kung 10 ni 21.03.2025 khan an va phun e.





ARTICLE

MUMBAI TO AIZAWL

-H. Lalruatlina
-Mumbai

Lengpui Airport khu AAI kutah nge awm se tha anga IAF kutah tih ngaihdan vawi khat te mah la sawi ve miah lo thian ka nei a. Chutiang ngaihdan han nei pha ve tur chuan vawi khat mah thlawhna-ah a la chuang lo hrim hrim bawk. Chu pa ngaihtuah reng chung chuan, thin phu zawih zawihin, Lengpui Airport-ah na zetin, kei leh ka chhungte kanrawn tum a. Rilru tawngtaina neih loh tawp chu har ve tak a ni.

Lengpui atanga Aizawl kanrawn tlan chhungin RV leh a chheh velah zu rui tih hriat ngawih ngawih, nelawm lo tak mi 6 ka hmu a, Scooty hnunga chuang hmeichhe rui zet 2 ka hmu bawk. Sap te, vai te leh hnamdang te pawhin Lengpui Airport atangin Aizawl hi anrawn pan ve thin awm ngei si a, kawng dunga ka hmuhte bak hi anrawn hmu bik hauh lo ang le!

Bawngkawn leh Ramhlun North inkarah motor, duhdah taka park te vangin darkar chanve dawn traffic jam-ah kan tang. Bawngkawn atanga Tlaklui kan tlan pelh hnuah kan veng tlangval ngat, pawng tawngtaw meng rum em em 2 ka hmu leh a. Han en vang vang pawhin RV lamah an down ve thin hmel khawp mai! Han men rum deuh ul kha an nileng hna chu a nih mai hmel e!

Matluangi dawr zawn ka thleng pheih a, engmah thawh hreh nei lo Lalthapuaia ka hmu. He nau hi ka phone-ah pheih chuan ‘Thapuaia Mibon’ tiin ka save! Mizoram pawnah tum 4 lai Chapchar kut-ah thu ka sawi tawh – Ka sawi ve ziah chu Mizo mipa chuan engtin emaw tal thawh chhuah a nei tur a ni tih hi. Thapuaia ka hmuh hian ka lawm. Rilru chhunggrila intodelh duh tlat kan veng tlangval dang pawh ka hmu ta fo mai. Ngun takin kan thalai, a bikin mipa te hian ngaihtuah rawh u. Hna hniam leh sang a awm lo, engemaw tal thawh tur.

Tun atanga kum 5 chhunga engmah thawhchhuah i nei miah lo a, YMA leh kohhran thalai pawla i pawt zuah zuah a nih chuan tu nula nu leh pa mahin makpa atan an it ngai lo ang che!

RSC Field-ah concert neih tumin kan zi lo hulh hulh a. He state rethei tak, cheng vaibelchhe tam tak ba nei tun hian engtinngemaw cheng nuai 15 man lai tuemaw motor man kan lo pek theih zawk le tih mawlh hi mak ka ti. A sum thawh tu leh an thawh zat theuh hmuh a chakawm hle mai. Khehpum/Chiahpuam kaihhnawih an awm ka va ring e. Income tax hi i pe tawh ang u (Ka thenawm pa chuan a man lo leh ang chu!).

Eng dress code mah mamawh lo Pu Piana, thahnemngai taka a sumdawng te, an fa nu doctor zirna hautak zet mai chawm hram hram tuma Pa Kunga leh Pi Kimi te thawhrim zia te hi hmuhnaawm ka va ti thin tak. Thangkhat lian zet thingpui dawrsiam ngar ngar Ngurpuii te hi zahna chibai ka buk fo thin. Vawi leh khata hausa thut, khawtlang pawhin kan sawi ruk sep sep te hi he khawtlang leh kohhran, chhungkua leh mimal pawh hian zah lohna chibai i buk ngam ang u.

Ka Article thupui leh a hmawr bawkna lam chu a inpersan hle mai a. Eng pawh nise, ka thenawm pa, Vanrotluanga pawh a duh hun hunah a lo leng a, a duh duh arawn sawi a. Peih lo chung chungin, ning ru em emin ka ngaithla thin.

Ka thu leh hla hi peih lo chung chung pawhin lo ngaithla u la, lo ngaihtuah chhunzawm ve teh u.



ADVERTISEMENT

GOVT. MODEL ENGLISH MEDIUM P/S

Ramhlun North
ADMISSION OPEN
Class: KG-I-IV
For Academic Session 2025-2026
Heng a hnuaia hming leh phone number tarlan ahte hian engtik lai pawhin a biak theih e
Contact
Headmaster - 9862300713 Miss Maengi - 9862304349
Miss Maremruiati - 9862075945 Miss kuri - 9862013295

MONT FORT HSS

Ramhlun North, Aizawl

CLASS IX- XII (Arts)

Admission hawn mek a ni

Experience teacher te zirtirna hmun a ni. Kum tin HSLC leh

HSSLC Result tha tak kan nei thin.

9436365546 / 8414960761

STAINE'S MEMORIAL SCHOOL

Chanmari, Aizawl

ADMISSION OPEN

CI-IX-XII (Arts, Science & Commerce)

Day Scholars & Hostellers

Contact : 7005631048/ 7005461509/ 9862665024/
7005679553

Office hour 9:30 am - 3:30 pm (Monday - Friday) (5-5)

ALDO'S DENTAL CHAMBER

Servamus plaza, 1st floor Ramhlun N

Ha leh ka chhung hrisel leh fai tak nei turin kan lo pui ang che, Opening month anih avangin 40% discount kan kalpui mek e.

For appointment:

8415848479

8415060649

PUBLIC HIGHER SECONDARY SCHOOL

Ramhlun Venglai, Aizawl

ADMISSION

CI-IX & XII (Arts)

26-28 March, 2025 (Time 10:00 am - 2:00 pm)

Subject offer Pol. Sc. History, Education, Economics, Geography

9862598857/ 9436782551/ 8014529834

ETHAN GO MOBILE

Ramhlun North

(LOAN inrawn la rawh le !!) Xioami android led TV wholesale!! SONY GOOGLE TV. SONY authorised dealer with brand warranty. Redmi, Samsung, Vivo, Oppo Mobiles etc.

9863179654/ 8794521678

PUANTHUI ZIR DUH TAN

Eizawnna tlak a puanthui zirthiam duh tan Admission hawn mek ani. Admission free.

9856012196

ST. STEPHEN'S SCHOOL

RAMHLUN 'N', AIZAWL

ADMISSIONS HS & HSS (Arts & Sc)

Zirtirtu tha tak te enkawlina *Zirlaite hmathlir neihpuina *Zirlaibu piahlam nunphung zirtirna

FREE ADMISSION FOR CL-IX (9774632726/ 9436353625)